

Proyecto pa “drop-outs” entrega na Minister Arthur Dowers

“Futuro den bo Man”: Un proyecto cu ta ofrece e hoben ‘drop-out’, un di dos chens den bida



INICIADORNAN di e proyecto “Futuro den bo Man”; autor y docente Yolanda Croes, pensionado policial sr. Humphrey de Miranda y Secretaria Ehecutivo sra. Frida Maduro a entrega concepto di nan proyecto di “Drop-Outs” na Minister di Enseñansa y Husticia mr. drs. Arthur Dowers.

E iniciadornan ta trahando riba e proyecto aki for di aña 2008 y nan a dune e nomber apropia “Futuro den bo Man”. E proyecto ta ofrece un solucion pa rescata e grupo grandi di drop-outs riba nos pais. Di e forma aki lo haci e hoben-

nan inactivo aki activo atrobe tanto riba tereno economico como educativo. Pa despues envolucra nan den nos sistema laboral pa finalmente e hoben por forma parti di nos comunidad como ciudadanonan digno.

Vocero di e fundacion i.o. sra. Yolanda Croes a bisa Minister Dowers cu pueblo ta sclama pa un solucion pa cu criminalidad y formacion di gang den bario. Barionan ta haciendo un apelacion fuerte riba nan ‘lidernan di bario of representantenan di bario’ pa intervencion di Gobi-

erno den e problematica aki.

“Di e forma aki nos ta cumpliendo cu tur bario preocupa aki na Aruba cu nos proyecto “Futuro den bo Man”.

E Fundacion i.o. ta trata di contribui cu nan granito ofreciendo asina nos hobennan cu a stop di bay scol y cu ta canando riba caya ta haci maldad, un educacion y entrenamiento practico pa siña nan un profesion.

Duna nan guia pa medio di asina yama ‘sponsornan’ pa trece nan bek den e mercado laboral, haciendo uso di e infraestructura existente manera scol, centronan di bario y nos mesun

profesionalnan.

Aworaki tin un cantidad grandi di drop outs na Aruba y e iniciadornan di e proyecto a ricibi bon cooperacion di e scolnan cu mas ta enfrenta e problema aki. Pa por cumpli cu nan meta sr. de Miranda, kende a traha mas cu 30 aña den Cuerpo Policial na Aruba y na Hulanda, a core stage pa un temporada na Albeda College na Rotterdam pa sigui di serca con e sistema ta funciona na Hulanda.

Aki e hobennan ta haya un tipo di ‘bijstand’ di nan gemeente y asina cu nan faya y keda sin bay scol, nan ta haya y e ‘bijstand’ ta wordo kita for di nan. Esaki ta un incentivo enorme y Minister Dowers a bisa cu e ta un punto cu nos lo por considera pa Aruba tambe.

E mandatario a keda sumamente contento cu e proyecto entrega pa un grupo di ciudadano preocupa, trahando voluntariamente pa yuda nos hobennan y nan pais.

E mandatario a priminti di duna e proyecto tur su atencion y cooperacion. E proyecto a wordo presenta na dje como Minister di Enseñansa como tambe Minister di Husticia ya cu un drop-out masha liher por

coge caminda di criminalidad.

Ta tristo, pero nos isla chikito conoce hopi criminal hubenil cu ta sera den KIA sin guia, sin ningun clase di prospecto pa un futuro drechi.

“Futuro den bo Man” kier duna e hobennan un man pa yuda nan sali for di e abismo cu nan a cay aden, pero finalmente ta ABO hoben tin Bo futuro den bo mes Man.

Na interes di e hoben drop-out y na henter comunidad Arubano ta necesario cu e potencial laboral di e hobennan aki wordo utiliza. Di e forma aki “Fundacion Futuro den bo Man” i.o. indirectamente kier traha na preveni y combati delincuentenan criminal hubenil y formacion di gang den e barionan na Aruba. Nos yiunan ta nos futuro. Si nos no cuida nan, ken lo cuida nan pa nos?

Finalmente a ofrece Minister Arthur Dowers si e lo hiba di gusto pa t’e Benefactor of Bescermheer di e proyecto importante aki. Riba e potretnan por aprecia e tres fundadornan di e proyecto “Futuro den bo Man”: Presidente sr. Humphrey de Miranda, Vice-Presidente y Secretario sra. Yolanda Croes y Tesorero sra. Frida Maduro.